

续资质通鉴长编

續貴州通志卷之四

續資治通鑑長編卷一百三十六

宋 李燾 撰

仁宗

慶祿二年五月癸卯朔封皇第三女爲安壽公主生三歲矣其母修媛張氏也贈修媛父故石州軍事推官堯封爲祕書監詔乃者以河北河東弓手爲軍蓋欲知山川道路服習耕戰而諸道游冗之人皆願雇代之籍其非正身者一切罷去

甲辰以天武捧日四廂都指揮使知并州恩州團練使高繼宣爲眉州防禦使先是敵寇麟府繼宣率兵營陵井抵天門關是夕大雨及河師半濟黑淩暴合舟不得進乃具牲酒爲文以禱俄而淩解師遂濟進屯府谷間

遣勇士夜亂賊營又募鯨配廂軍三千餘人號清邊軍

命偏將王凱主之軍次三松嶺敵數萬眾圍之清邊軍

奮起斬首千餘級其相蹈藉死者不可勝計築甯遠寨

相視地脈鑿石出泉已而城清塞等五寨繼宣皆與有

勞焉此事不得其時據繼宣傳與西上閤門使忠州

刺史并代鈐轄專管勾麟府軍馬張亢領果州團練使

爲高陽關鈐轄初麟州猶未通饋路閉隔敕亢自護南

郊賞物送麟州賊旣不得鈔遂以兵數萬趨栢子寨邀

我歸路亢所將才三千人亢激怒之曰若等已陷死地

前鬪則生不然爲賊所屠無餘也士皆感勵會天大風

順風擊之斬首六萬餘級相蹂躪崖谷死者不可勝計

奪馬千餘匹乃修建甯寨賊數出爭遂戰於兔毛川亢

以大陣折賊而使驍將張岳以短兵强弩數千伏山後
亢以萬勝軍皆京師新募市井無賴子弟疲爽不能戰
遇賊必走賊目曰東軍素易之而虎翼卒勇悍陰易其
旗以誤賊賊果趣東軍而值虎翼卒搏戰良久發伏賊
大潰斬首二千餘級不踰月築清塞百勝中候建甯鎮
川五堡麟州路始通亢復奏今所通特往來之徑爾旁
皆虛空無所阻若增築並邊諸柵以相維持則可以廣
田牧河外勢益强議未下而朝廷慮契丹將渝盟乃徙
亢高陽敕亢護送郊賞據附傳乃今年事按去年十一
月祀南郊不知何故今年方送賞物當考因亢
遷高陽遂書之殿中丞平棘郭諮言恐契丹背盟犯界請決
御浚葫蘆新唐五河使之北出則深冀瀛鄭諸州皆在
水東足以限隔敵騎宰相呂夷簡薦諮言可用

乙巳換授郭諮崇儀副使提舉黃河等處隄岸尋復詔
內藏庫使帶御器械鄧保信洛苑使普州刺史楊懷敏
同規度利害以聞諮等議決黎陽大河下與葫蘆滹沱
後唐河相合以注塘泊混界河使界東北抵於海上溢
鵲鵲坡下洙北當城南視塘泊界截敵疆東至海口西
接保塞惟保塞正西四十里水不可到請立堡寨以兵
戍之詔儲用興役會契丹約和而止

諮等議據諮傳然
字或差誤當求別

本是正之盜鵲鵲坡下洙
北此七字必有差誤者

丁未河東都轉運使戶部郎中天章閣待制明鎬遷左
司郎中以修建甯中候百勝鎮川清塞等堡寨成賞其
勞也

戊申安壽公主薨追封唐國公主以母寵帝愛甚成服

苑中羣臣奉慰殿門外

庚戌河北都轉運使李昭述請修澶州北城從之先是河決久未塞昭述但以治隄爲名調農共八萬逾旬而

就劉六符過之真以爲治隄也及還而城具甚駭昭述附

見據李肅之傳修城乃肅之建議也肅之時通判澶州

辛亥御崇政殿錄繫囚洛苑使普州刺史楊懷敏爲

入內押班先是張方平言伏以天下承平爲歲深遠

而國用不贍民力益困今聚師境上調費寢廣倚於經

入則財不給加以橫賦則人不堪救茲交急特在陛下

身先率下惟事事得其樽節而已臣竊惟陛下躬勤節

用克自抑畏凡諸服御殊爲菲薄而茲中外之論皆言

用度之過臣竊疑之蓋宮闈嬖昵左右近習假威恣橫

敢爲欺誣仰恃仁慈緣爲姦弊且禁中呼索輒稱聖旨有司應奉皆爲上供外人不知其詳而譏議累乎盛德國家帑藏之困乃羣下侵牟之蠹也伏願陛下上念宗社之計下以生民爲心彼婦人宦者何須過於姑息超然遠慮斷自天心試取先帝之世及陛下臨御以來天聖之初宮司帳籍如內東門之類比較近年支費金帛則知增損豐儉之數以一言裁減之恩爲萬方廣富之本兆民所賴爲幸實深先朝已前事恐難繼若天聖初體例夫豈遠哉因降詔書詔天下以陛下憂邊之心愛民之故則將卒聞之孰不奮勵以授命士民間之孰不鼓舞以稱仁至於外諸司庫務凡百橫費乞特置司局選用公平通敏諳曉時務之士兩三員條理之而以大

臣一人監領其事其不便者惟是左右主當之人爾誠
陛下斷之不疑無容沮撓則上可以資德美下可以施
恩惠內可以集國計外可以成武功效速而利多事近
而德遠此當世之切務也方平旣受詔與賈昌朝等減
省浮費又言竊聞淵旨先是宮禁裁省一切用度至於
聖躬奉給緡錢亦令罷供此蓋陛下身先勤儉爲生靈
計夫減省所爲者自下而議上則於禮不順由上以率
下則於名爲正臣願以禁中所行之事權其大者三數
節宣示外廷因發明詔使天下共知聖意憂邊愛人之
深則中外臣庶得不體國家之急上成德美者乎特在
陛下斷之清衷不屑細言則成功可冀也其有徇己之
私與則喜奪則怒此女子與小人之情怨謗所由生也

臣輩敢不竭情盡慮上副天心

壬子內出詔書減皇后及宗室婦郊祀所賜之半著為

式又詔皇后嬪御進奉乾元節回賜權罷邊事甯日聽

旨於是皇后嬪御各上俸錢五月以助軍費宗室刺史

以上亦納公使錢之半荆王元儼盡納公使錢詔以半

給之減罷回賜乃甲寅日今從本志并書給元儼公使

殺人事附明年五月甲午

癸丑命知貝州供備庫使恩州團練使張茂實為回謝

契丹國信副使代符惟忠也惟忠行至武强病卒富弼

請以茂實代之詔從其請初轉運使張盥之奏罷冀貝

驍捷軍士上關銀鞬錢事下茂實議茂實言此界河策

先鋒兵有戰必先故平時賜與異於諸軍不可罷盥之

猶執不已其後遂奏罷保州雲翼別給錢糧軍怨果叛
此據茂實傳保州雲翼軍叛事在四年八月盪之以此
年三月爲河北漕三年五月入爲鹽鐵副使十月又爲
漕都

甲寅詔三館臣僚上封事及聽請對

余靖論文彥博知秦州狀以爲五月

七日敕按甲寅乃
十二日今從實錄

集賢校理歐陽修上疏曰臣近準

詔書許以封章言事臣學識愚昧不能廣引深遠以明
治亂之源謹采當今急務爲三弊五事以應詔書所求
伏惟陛下裁擇臣聞自古王者之治天下雖有憂勤之
心而不知致理之要則心愈勞而事愈乖雖有納諫之
明而無力行之果斷則言愈多而聽愈惑故爲人君者
以細務責人專大事而獨斷此致理之要也納一言而
可用雖眾議不得以沮之此力行之果斷也知此二者

天下無難致理矣臣伏見國家大兵一動中外騷然陛下思社稷之安危念兵民之困弊四五年來憂勤可謂至矣然兵日益老賊日益強併九州之力平一西戎小者尙無一人敢前今又北敵大者違盟妄作其將何以禦之從來所患者外藩今外藩叛矣所患者盜賊今盜賊起矣所憂者水旱今水旱作矣所仰者民力今民力困矣所急者財用今財用乏矣陛下之心日憂於一日天下之勢歲危於一歲臣所謂用心雖勞而不知求致理之要者也近年朝廷雖廣言路獻計之士不下數千然而事緒轉多枝梧不晤從前所采眾議紛紜至於臨事誰策可用此臣所謂聽言雖多不如力行之果斷者也臣伏思聖心所甚憂卽當今所最闕者不過曰無兵

也無將也無財用也無禦敵之策也無可任之臣也此五者陛下憂其未有而臣謂今皆有之然陛下未得而用之者陛下未思其術也國家創業之初四方割據中國地狹兵民不多然尙能南取荆楚收僞唐西平巴蜀東下并潞北窺幽薊當時所用兵財將吏其數幾何惟善用之故不覺其少豈如今日承平百年祖宗之業盡有天下之富強人眾物盛十倍國初故臣敢曰有兵有將有財用有禦敵之策有可任之臣然陛下皆不得而用者何哉由朝廷有三大弊故也何謂三大弊一曰不謹號令二曰不明賞罰三曰不責功實此弊因循於上則萬事弛慢廢壞於下臣聞號令者天子之威也賞罰者天子之權也若號令煩而不信賞罰行而不當則天

下不服故又須責臣下以功實然後號令不虛出而賞
罰不濫行是謹號令明賞罰責功實此三者帝王之奇
術也自古人君英雄如漢武帝聰明如唐太宗皆能知
三術而自執威權之柄故所求無不得所欲皆如意漢
武帝好用兵則誅滅遠方立功萬里以快其心欲求將
則有衛霍之材供其指使欲得賢士則有公孫董汲之
徒以稱其意唐太宗好用兵則誅突厥破遼東威加四
海以逞其志欲求將則有李靖李勣之儔入其駕馭欲
得賢士則有王衛房杜之輩奉其左右此二帝凡有所
爲後世莫及可謂所求無不得所欲皆如意無他術也
惟能自執威權之柄爾伏惟陛下以聖明之資超越二
帝又盡有漢唐之天下然而欲禦邊則常患無兵欲破

賊則常患無將欲贍軍富國則常患無財欲威服遠方則常患無策欲任使賢才則常患無人是所求皆不得所欲皆不如意其故無他由不用威權之術也自古帝王或爲強臣所制或爲小人所惑權不得出於己方今外無強臣之患又無小人獨任之惑內外臣庶尊陛下如天愛陛下如父傾耳延首願聽陛下之所爲何憚而久不爲哉若一旦赫然執威權以臨之可使萬事皆辦何患五者之無奈何爲三弊之因循而一事之不集臣請言三弊夫言多變則不信令頻改則難從今出令之初不加詳審行之未久尋又更張以不信之言行難從之令故每有處置之事州縣知朝廷未是一定之命則官吏咸相謂曰且未要行不久必須更改或曰備禮行

下略與應破指揮旦夕之間果然又變至於將吏更易道路疲於迎送文牒縱橫上下莫能遵懷官吏軍民或聞而歎息或聞而竊笑號令如此欲感天下其可得乎此不謹號令之弊也古今用人之法不過賞罰而已然賞及無功則恩不足勸罰失有罪則威無所懼雖有人不可用矣臣嘗聞太祖時王全斌等破蜀而歸功不細矣犯法一貶十年不問蓋是時方伐江南故黜全斌與諸將立法及江南已下乃復其官太祖神武英斷所以能平天下者賞罰分明皆如此也自關西用兵四五年矣賞罰之際是非不分大將以無功而依居舊官軍中見無功者不妨居好官則諸將誰肯立功矣偏裨畏懦逗遛法皆當斬或暫貶而尋遷或不貶而依舊軍中見

有罪者不誅則諸將誰肯用命矣所謂賞不足勸罰無所懼賞罰如此而欲用人其可得乎此不明賞罰之弊也自兵動以來處置之事不少然多有名無實請略舉其一二則其他可知數年以來點兵不絕諸路之民半爲兵矣其間老弱病患短小怯懦者不可勝數兵額空多所用者少此有點兵之虛名而無得兵之實效也新集之民所在教習追呼上下民不安居主教者非將領之才所教者無旗鼓之法往來州縣怨歎嗷嗷旣多是老弱小懦之人又無訓齊精練之術此有教兵之虛名而無訓兵之實效也諸州所造器械數不少矣工作之際已勞民力運輦搬送又苦道路然而鐵刃不鋼筋膠不固長短小大多不中度蓋造作之所但務充數而速